

Tomahawk & Cut-EFX – Robert Fellmann

Text: Thomas Murer / Beat: Daniel Manickam

Strophe 1

Robert Fellmann, ich känn dich ned würllich, aber hee
du hesch dich i dim Läbe verwürklicht und no meh
wer cha scho behaupte, dass er macht, was er liebt
Komponischt und Dichter, es Läbe fürs Jodellied

Und drüber us hesch dini Schpure hinterla
ide Höchi, bi de Toure über Bärge und durs Tal
oder i dim Tagebuech, schribsch uf, was bi dier gad
du bisch de Vater vom Jodellied, hesch dich niedergla in Baar

En grossi Schar singt no immer dini Lieder und hed Spass
hätsch das dänkt, wo die Lieder gschribe hesch dazumals
sich es Zämezüere vo Mänsche und vo Stimmorgan
en Schwizer Tradition chund dank dir vora

Text und Musig Robert Fellmann, dass isch dier wichtig gsi
meh als 144 Shtück wised uf das hi
sigs für Jodler-, Trachte- oder für de Männerchor
d Lieder findet hüt no de Wäg i so vili Ohr

Ref. 2x

**Mer fired dini Wärrh, fired a dem Tag
fired da in Baar, im Robert-Fellmann-Park
Zuekunft hed Herkunft, doch glich wos dure gad
dis Schaffe isch lebändig, nor uf das chunds drufa.**

Strophe 2

Du hesch d Natur beobachtet und das i dini Text bracht
s Dorfläbe, Brüüch und d Alpe bringsch uf's Textblatt
du hesch chönne zeichne, bringsch uf jedes Blatt dis eigne
Bild und chasch dis Schaffe als Künstler vereine

Dini Wärrh werdet ide Fantasie lebändig,
wenn mer sie lost, fühlt mer sich, als wör mer sitze ufem Bänkli
irgendwo i de Alpe, eifach mal abschalte
und durs Singe cha sich s Innere entfalte

I dine Lieder hed mer shtets Freud und Zfrideheit gfunde
sogar mis Grosi hed under dinere Leitig gsunge
i de Trachtegruppe Baar, singe isch für sie Erholig gsi
und jez rap ich über dich über so Hip-Hop-Beats

Du hesch dine Idee'e au kei Gränze gsetzt
witerentwickle heisst, dass mer sich verändered
ned s Neue isch besser und au ned s Alte
usem Ustusch und Zämezüere isch öbis Neus entstande

Ref. 2x

**Mer fired dini Wärrh, fired a dem Tag
fired da in Baar, im Robert Fellmann Park
Zuekunft hed Herkunft, doch glich wos dure gad
dis Schaffe isch lebändig, nor uf das chunds drufa.**